

中国史学史 资料编年

(第三册)

杨翼骧 编

南开大学出版社

全国高等院校古籍整理
研究工作委员会资助项目

中国史学史资料编年

第三册

元、明

杨翼骧 编

南开大学出版社

中国史学史资料编年

第三册

元、明

杨翼骧 编

南开大学出版社出版

(天津八里台南开大学校内)

邮编 300071 电话 23508542

新华书店天津发行所发行

天津宝坻县印刷厂印刷

1999年2月第1版 1999年2月第1次印刷

开本:850×1168 1/32 印张:15.125 插页:2

字数:376千 印数:1-1500

ISBN 7-310-01173-2

K·86 定价:18.00元

例 言

一、本书系将先秦至清朝末年比较重要之史学事迹按年(每年内按月日顺序)编列,以为学习和研究中国史学史之参考。

二、所标年代首列公元纪年,次列各朝帝王年号及年数,后列干支。因所引资料均系旧历年月,故以旧历为准。但旧历与公元有岁差,旧历十一月至十二月间,常为公元之次年。为免将旧历一年中之事分列两年或在公元一年中并列两种旧历纪年,仍按一般年表编列于旧历岁首之公元年数。

三、书中引录之文字,以原始资料与最早记载为主。后人之论述,除有关年代、事迹、著述内容者外,均不具录。

四、历史地理著作,仅列其记述全国范围者。地方志除有特殊价值者外,均不具录。

五、史家之生平事迹,只录其主要经历及有关史学之活动,其他如政治、军事、经济、文学、哲学等方面之事迹,均不具录。

六、所列事迹之年代,如引录之资料中无明文记载,则加按语以说明编于某年之理由。有些事迹,仅知在某朝,而不能考定其确实年代或大约年代者,则附编于某朝灭亡之年。

七、有些史书,如不能考定其著作年代,但知其作者卒年,则编于作者卒年之下。

八、史家之生卒年代均可考知者,除对于史学有重大贡献者外,一般只列卒年,不列生年。

王应麟著成《通鉴地理通释》。

《宋史》卷四三八《王应麟传》：“王应麟，字伯厚，庆元府人。九岁通《六经》，淳祐元年举进士，从王埜受学。调西安主簿。……差监平江百万东仓。调浙西提举常平茶盐主管帐司。……调扬州教授。初，应麟登第，言曰：‘今之事举子业者，沽名誉，得则一切委弃，制度典故漫不省，非国家所望于通儒。’于是毕门发愤，誓以博学宏辞科自见，假馆阁书读之。宝祐四年中是科。……添差浙西安抚司干办公事。……迁主管三省、枢密架阁文字。迁国子录，进武学博士。……召为太常博士，擢秘书郎。……迁著作佐郎。度宗即位，摄礼部郎官，草百官表。……授兼礼部郎官、兼直学士院。……迁著作郎，守军器少监。……迁将作监。……擢兼侍立修注官，升权直学士院，迁秘书少监兼侍讲。……迁起居舍人，兼权中书舍人。……以秘阁修撰主管崇禧观。久之，起知徽州。……召为秘书监，权中书舍人，力辞，不许。兼国史编修、实录检讨兼侍讲。迁起居郎兼权吏部侍郎。……授中书舍人兼直学士院。……进兼同修国史、实录院同修撰兼侍读，迁礼部侍郎兼中书舍人。……寻转尚书兼给事中。……所著有……《通鉴地理通释》十六卷。”

王应麟《通鉴地理通释·书后》：“太极肇分，天先成而地后定。天依形，地附气。地，囿于天者也，而言地理者，难于言天，何为其难也？日月星辰之度，终古而不易。郡国山川之名，屡变而无穷。是故图以经之，书以纬之，仰观俯察，其用一也。《虞书》九共，先儒以为九丘，其篇轶焉，传于今者，《禹贡》、《职方》而止耳。若《山海经》、《周书·王会》、《尔雅》之《释地》、《管子》之《地员》、《吕览》之《有始》、《鸿烈》之《坠形》，亦好古爱奇者所不废。然诸儒之传注异，历代之区宇殊。禹之九河，班《志》仅得其三。商之八迁，孔疏未闻其

四。汉水东西之分，积石大小之辨，荆山之于荆豫，梁岐之于冀雍，潜在荆者未见，蔡在圻内者未详，三江、九江、五邦、三亳，则《书》之说异焉。还之为营，称之为坭，以著为齐地，以韩城为涿郡，自土之为自杜，倭迟之为郁夷，邹虞之为梁邹，二南之为南郡、南阳，则《诗》之说异焉。扬纡在冀，而《尔雅》以为秦。卢水在济北，而康成读为雷、漳。水之为潞，吴山之为岳，五湖混于具区，颍湛列于荆浸。此《职方》之疑也。豫章在江南，而江北之地未知。中牟在河南，而河北之地难考。许田，鲁地而非近许。鄢，郑邑而非鄢陵。穀、小穀之有别，父城、城父之不同。此《春秋》之疑也。二地而一名者，若王城、葵丘、酒泉、贝丘、钟离之类；一地而二名者，若白羽、夹谷、夷垂、葭、发阳之类；方城、细柳、丹水之有三，塋山、历山、东阳、武城之有四；瞻彼洛矣与东都之洛异，导洛自熊耳与宜阳之熊耳殊；首阳、空桐、新城、石门、石城、丹阳、白沙、硖石之属，其地非一；毕万之魏为河中之永乐，而以元城为大名，失矣；自庐振廩为襄阳之中庐，而以合肥为庐国，失矣；潘岳赋西征，不知成师之曲沃在河东；韩皋论《广陵散》，不知魏之扬州治寿春；韩文公南阳人，在河内之修武而误曰邓州；《史记》郾关在汉中之长利，而误曰洵阳；杜子美诗三奇戍在彭州之守江，而误改曰三城；荀卿兰陵非常州也，孔明渡泸非泸州也，公琰屯涪非涪州也，公瑾赤壁非黄也，元规南楼而鄂也，郢都白雪误于郢州，东海二疏误于海州，以塋山为会稽，以啮桑为采桑，以大别为安丰，以东陵为庐江，以楚丘为成武，以街亭为南郑。袭讹踵缪，不可殫记。汉、沔一也，而或二之；吴、会二也，而或一之；江统误酆于沛郡，皇甫谧误商丘于濮阳，颜师古误邛都于邛州、青衣于嘉州、南陵于宣州；注《文选》不知夷庚，注《本草》不知沙苑，博见强志者犹或失之。旧迹湮没，如济绝于茱、碣石论于海，昆明凿而镐京为池，隋城立而汉都为苑。南北侨置，如青有太原，豫有广陵，六合为秦郡，项城之为祿陵，玉门之为会稽，浔阳在蕲而移柴桑，当塋在濠而寓姑孰。郡名非古，如云之云中，平之北平，蓟之

渔阳。县名非古，如京兆之武功，丰州之九原，皆非秦汉之旧。或若异而同，或似是而非，不可谓博识为玩物而不之考也。余闲居，观《通鉴》将笺释其地名，举纲提要，首以州域，次以都邑，推表山川，参以乐毅、王朴之崇论宏议，稽《左氏》、《国语》、《史记》、《战国策》、《通典》所叙历代形势，以成兴替成败之鉴。大易设险守国，《春秋》书下阳、彭城、虎牢之义也。河湟复而唐衰，燕代割而辽炽，述其事终焉。若对白题、羊肠、帝丘、内黄、问松亭、柳河者，以该洽见称，今岂无其人乎？孤陋寡闻，未免阙误，以俟博雅君子。山河不改，陵谷屡迁，亦以发鉴古之一慨云。上章执徐岁桔壮之月，子王子书《通释》后。”

钱大昕《王伯厚年谱》（《潜室先生年谱》）：“元世祖至元十七年庚辰，五十八岁。八月，《通鉴地理通释》成。”

《宋史》卷二〇三《艺文志》二《职官类》：“王应麟……《通鉴地理通释》十四卷。”

《四库全书总目提要》卷四七《史部·编年类》：“《通鉴地理通释》十四卷，宋王应麟撰。……是书以《通鉴》所载地名，异同、沿革最为纠纷，而险要阨塞所在，其措置得失亦足为有国者成败之鉴。因各为条例，厘定成编。……书本十四卷，《宋史》本传作十六卷，疑传刻之讹也。其中征引浩博，考核明确，而叙列朝分据战功，尤一一得其要领，于史学最为有功。原书无序，后人以书后应麟自跋移冠于前。所云上章执徐桔壮之月，乃元世祖至元十七年庚辰八月，自时宋亡已三年，盖用陶潜但书甲子之义。书内称梓慎为梓谨，亦犹为宋讳云。”

《古今纪要》等作者黄震卒。

《宋史》卷四三八《黄震传》：“震常告人曰：‘非圣人之书不可观，无益之诗文不作可也。’……所著《日抄》一百卷。卒，门人私谥曰文洁先生。”

《宋元学案》卷八六《东发学案·文洁黄于越先生震》：“黄震，

字东发，慈溪人，学者称为于越先生。……宋亡，饿于宝幢而卒，门人私谥曰文洁先生。先生本贯定海，其后徙于慈溪。晚年，自官归，复居定海灵绪乡之泽山，榜其门曰‘泽山行馆’，其室曰‘归来之庐’。已而迁寓桓溪，自署‘杖锡山居士’。已而又避地同谷。”

《宋元科举三录·宝祐四年登科录》：“第四甲第一百五人黄震：字东发，年四十四，五月十四日辰时生。……本贯庆元府慈溪县，自为户。”

陈垣《黄东发之卒年》（见《辅仁学志》第十二卷一、二期，1943年12月）：“黄东发之生年，据宝祐四年登科录年四十四，则应生于嘉定六年癸酉。其卒年则各家疑年录均未之及也。陈著《本堂集》九十有挽黄提举震及挽黄祖勉梦榦各三首。祖勉，东发子，本堂与东发为同年进士，与祖勉为亲家，其次女，祖勉冢妇也。其挽东发诗注云：‘戊寅十月访于山居。’又云先生六十七岁，作《醉吟先生传》，则祥兴二年己卯，东发犹健在也。其挽祖勉诗云：‘谁料生芻奠，今年又乃翁。’又云：‘九京不可作，乔梓北风悲。’则东发父子同一年卒也。其挽祖勉诗注云：‘到山北葺精舍，未竟得病，返寓所宝幢见亲，未见而歿。’则祖勉先卒于东发也。然两诗均不著撰年，惟挽祖勉诗有‘辰龙竟归梦’之句，辰龙似指元至元十七年庚辰，则东发卒年当六十有八。《本堂集》三十七有《赠吴安仲序》。安仲，东发婿，序亦不著撰年，而有‘余交国史黄公为深，公死已十有五年’之语。假定东发卒于庚辰，则此序当作于元贞元乙未。此序之前一序为《蒋定叔（樵吟集）序》，末署‘旃蒙协洽孟春，嵩溪遗耄陈某八十二岁书。’正是元贞乙未。即续有发见，当不至大谬。诸生有欲撰东发年谱者，因举以示之。新会陈垣。”

刘一清于本年后著成《钱塘遗事》。

《四库全书总目提要》卷五一《史部·杂史类》：“《钱塘遗事》十卷，元刘一清撰。一清，临安人，始末无可考。其书虽以钱塘为名，而实纪南宋一代之事。高、孝、光、宁四朝所载颇略，理、度以后叙录

最详。大抵杂采宋人说部而成。故颇与《鹤林玉露》、《齐东野语》、《古杭杂记》诸书互相出入，虽时有详略同异，亦往往录其原文。……然于宋末军国大政，以及贤奸进退，条分缕析，多有正史所不及者。盖革代之际，目击僨败，较传闻者为悉。……世无刊本，传写颇稀。……此乃旧抄足本，前后无序跋，唯卷端题识数行，惜高宗不都建康而都于杭，士大夫湖山歌舞，视天下事于度外，卒至纳土卖国。不署名氏，详其词意，殆亦宋之遗民也。”

钱大昕《补元史艺文志》卷二《杂史类》：“刘一清《钱塘遗事》十卷，记南宋事。”

按：刘一清著书年代不详，据《四库提要》所述，当系宋亡入元后所作，暂编于此，容再查考。

1281 元世祖至元十八年 辛巳

王应麟著成《汉制考》。

王应麟《汉制考·序》：“汉制载于史者，先儒考之详矣，其见他书者未之考也。……诸儒占毕训故之学，虽未尽识三代旧典，而以汉制证遗经，犹幸有传注在也。……盖自西晋板荡之后，见闻放失，习俗流败，汉世之名物称谓，知者鲜焉，况帝王制作之法象意义乎？此汉制之仅存于传注者，不可忽不之考也。愚少尝有闻，老弗敢坠，因绌次为编，以俟后之君子。自流溯原，三代之礼庶乎其可识矣。辛巳夏五，子王子序。”

《宋史》卷四三八《王应麟传》：“所著有……《汉制考》四卷。”

《宋史》卷二〇三《艺文志》二《职官类》：“王应麟……《汉制考》四卷。”

《四库全书总目提要》卷八一《史部·政书类》一：“《汉制考》四卷，宋王应麟撰。……是编因《汉书》、《续汉书》诸志于当日制度，多详于大端，略于细目，因摭采诸家经注及《说文》诸书所载，钩稽排

纂，以补其遗，颇足以资考证。又以唐时贾、孔诸疏，去古已远，方言土俗，时异名殊，所谓某物如今某物，某事如今某事者，往往循文笺释，于旧文不必悉符，亦一一详为订辨。……其中偶失考定者，……未免千虑之一失。要其大致精核，具有依据，较南宋末年诸人侈空谈而鲜实征者，其分量相去远矣。”

钱大昕《王伯厚年谱》：“元世祖至元十八年辛巳，五十九岁。五月，《汉制考》成。”

王恽著成《承华事略》。

《元史》卷一六七《王恽传》：“王恽，字仲谋，卫州汲县人。……中统元年，左丞姚枢宣抚东平，辟为详议官。时省部初建，令诸路各上儒吏之能理财者一人，恽以选至京师，上书论时政，与渤海周正并擢为中书省详定官。二年春，转翰林修撰、同知制诰，兼国史院编修官，寻兼中书省左右司都事。……至元五年，建御史台，首拜监察御史。……九年，授承直郎、平阳路总管府判官。……十三年，奉命试儒人于河南。十四年，除翰林待制，拜朝列大夫、河南北道提刑按察副使，寻改置诸道制下，迁燕南河北道。……十八年，拜中议大夫、行御史台治书侍御史，不赴。裕宗在东宫，恽进《承华事略》，其目曰：广孝、立爱、端本、进学、择术、谨习、听政、达聪、抚军、崇儒、亲贤、去邪、纳海、几谏、从谏、推恩、尚俭、戒逸、知贤、审官，凡二十篇。裕宗览之，……令诸皇孙传观，称其书弘益居多。”

《承华事略序》：“臣恽尝读文王《世子》、贾谊《保傅》篇，二者教养太子之方尽矣。第去古逾远，其典礼不有复行于今者。又伏念殿下春秋鼎盛，以天挺英叡之资，复有不待学焉而后能者，故臣愚虑敢述其切时近用，可举于今，庶有补于来者，著而为篇。然事有先后，必循序而进。窃谓孝者德之本也，唯天子之孝以宁亲敷教为大，故首之以《广孝》。爱者孝所生也，唯孝友于兄弟，故继之以《立爱》。孝爱既立，亟当正者国之本也，故继之以《端本》。本虽端，非学无以成其德，故继之以《进学》。学不无异端之害，故以《择术》、《谨习》次

之。教尊德成，必取正于官，非德政无以验诸用，非达聪无以周其知，故方其《听政》，即以《达聪》继之。国政之外，兵戎为重，故以《抚军》次之。军国事殷，举措之间恐涉僭倣，故以《明分》次之。文武并用，长久之术，故继之曰《崇文》。尚文之实，亲贤为本，然不可不辨其邪正，故《亲贤》后继之曰《去邪》。正人之言，无匪弘益，故继之曰《纳海》。虽圣人不能无过，谏而能改，善莫大焉，故先以亲之《几谏》，次以己之《从谏》，思互为儆省尔。至若仁民爱物，非德泽何以加，故预之以《推恩》。德加于民，而俭约、逸豫，居上者尤所当尚、戒。天下之事无大小，官得人则治，故以《审官》终之。自《广孝》至《审官》，凡二十篇，厘为六卷。篇有图，俾见古人当时事迹之伟；后有说，以致愚虑循序近用之义，且易于按观焉，题之曰《承华事略》。……臣王恽谨序。”

王恽《进承华事略牋》（见《秋涧先生大全文集》卷七八）：“臣恽谨言：伏以学止虚文，在明时而何补；士传民语，恐小道之可观。俯沥愚衷，仰陈瞽颂，臣诚惶诚恐，叩头叩头。恭惟皇太子殿下温文海润，孝敬日晖，方丕承天序之时，有历试诸难之命。事统殆万几之广，君门邈千里之遥。虽叡足以有临，明足以继照，仁足以及物，智足以周知，复多识于前言，乃益隆于孝治。谨采储闻之事要，庶几贾傅之遗规，倖赐乙观，岂胜至幸。波洋少海，固不择于细流；德表华箴，窃効持于众美。臣恽今所纂集，名曰《承华事略》，凡二十篇，厘为六卷。谨奉牋投进，冒渎严威，无任激切屏营之至。臣恽诚惶诚恐，叩头叩头，谨言。至元十八年十二月日，朝列大夫、燕南河北道提刑按察副使臣王恽进。”

黄虞稷《千顷堂书目》卷九《典故类》：“王恽……《承华事略》六卷。”

《四库全书总目提要》卷八九《史部·史评类存目》一：“《承华事略》一卷，元王恽撰。……此书成于至元十八年。时裕宗为太子，恽官燕南河北道副使，因作此进于东宫，载前代为太子者之事，加

以论断。裕宗甚喜是书，令诸皇孙共传观焉。已载所著《秋涧集》中，此后人抄出别行之本。《进书启》称二十篇，厘为六卷，今止一卷，亦后人所合并也。”

1285 元世祖至元二十二年 乙酉

马廷鸾著成《读史旬编》。

《宋史》卷四一四《马廷鸾传》：“马廷鸾，字翔仲，饶州乐平人。……登淳祐七年进士第，调池州教授，需次六年。宝祐元年，召赴都堂审察，辞。至池以礼帅诸生。二年，调主管户部架阁。三年，迁太学录，召试馆职。……迁秘书省正字。四年，尤焞提举史事，辟为史馆校勘。……开庆元年，吴潜入相，召为校书郎。景定元年，兼沂靖惠王府教授。……兼权枢密院编修官。……迁枢密院编修官兼权仓部郎官。二年，进著作佐郎兼右司，迁将作少监。三年，……擢军器监兼左司，兼太子右谕德，升左谕德，行国子司业。……兼翰林权直，擢秘书少监，升权直学士院。四年，擢起居舍人兼太子右庶子兼国史院编修官、实录院检讨官。……五年，……迁礼部侍郎。……升直学士院。咸淳元年，进端明殿学士、签书枢密院事兼同提举编修《经武要略》。……三年，同知枢密院事兼同提举编修《经武要略》。……兼权参知政事。五年，进参知政事兼同知枢密院事，进右丞相兼枢密使。八年，九疏乞罢政。九年，依旧观文殿大学士、知绍兴府、浙东安抚大使。上疏辞免，依旧职提举临安府洞霄宫。……瀛国公即位，召不至。”

马廷鸾《读史旬编自序》（见《碧梧玩芳集》卷二一）：“《读史旬编》者，病叟暮年之所著也。昔东莱吕太史著《大事记》，其为书也，曰纪事，列事之目，无所褒贬抑扬；曰通释，本《易·系辞》、《书》、《诗》序，旁采刘向、董仲舒、史迁以及胡五峰之说，明帝王之统纪；曰解题，为始学者设，所载皆职分之所当知，非事驳杂求新奇，出于

人所不知也。初，公之为书，本起春秋及五代，书未及成而绝笔于汉武帝征和三年。朱文公屡惜之，伤斯文之不续，后学之不得私淑诸人也。今辄不自揆，本康节邵氏《经世纪年图》，朱文公《通鉴纲目》，略仿吕氏义例，而为《读史旬编》。旬者，日之甲癸也，《书》曰‘期三百有六旬’是也。吾书以日之甲癸，比于年之甲癸，谓之‘旬编’。自尧甲辰至五代周显德七年庚申（周以此年正月四日方禅），三千三百一十七年为三百三十二旬（末旬自甲至庚），类而编之。……经始于壬午之冬，彻编于乙酉之秋，越三岁而后三十有八帙之书成。”按：自壬午（至元十九年）“经始”，至乙酉（至元二十二年）“彻编”，故云“越三岁”。

胡三省著成《资治通鉴音注》、《通鉴释文辨误》。

胡三省《新注资治通鉴序》：“古者国各有史，以纪年书事。……唐四库书，编年四十一家，九百四十七卷。……今四十一家书，存者复无几。乙部书以迁、固等书为正史，编年类次之，盖纪、传、表、志之书行，编年之书特以备乙库之藏耳。宋朝英宗皇帝命司马光论次历代君臣事迹，为编年一书。神宗皇帝以鉴于往事，有资于治道，赐名曰《资治通鉴》，且为序其造端立意之由。温公之意，专取关国家盛衰，系生民休戚，善可为法，恶可为戒者，以为是书。……世之论者率曰：‘经以载道，史以记事，史与经不可同日语也。’夫道无不在，散于事为之间，因事之得失成败，可以知道之万世亡弊，史可少欤？为人君而不知《通鉴》，则欲治而不知自治之源，恶乱而不知防乱之术。为人臣而不知《通鉴》，则上无以事君，下无以治民。为人子而不知《通鉴》，则谋身必至于辱先，作事不足以垂后。乃如用兵行师，创法立制，而不知迹古人之所以得，鉴古人之所以失，则求胜而败，图利而害，此必然者也。孔子序《书》，断自唐、虞，讫文侯之命而系之秦。鲁《春秋》则始于平王之四十九年。左丘明传《春秋》，止哀之二十七年赵襄子弑智伯事。《通鉴》则书赵兴智灭以先事。以此见孔子定《书》而作《春秋》，《通鉴》之作，实接《春秋左氏》后也。

……先君笃史学，淳祐癸卯始患鼻衄，读史不暂置，洒血渍书，遗亦故在。每谓三省曰：‘《史》、《汉》自服虔、应劭至三刘，注解多矣。章怀注范史，裴松之注陈寿史，虽间有音释，其实广异闻，补未备，以示博洽。《晋书》之杨正衡，《唐书》之窦苹、董冲，吾无取焉。徐无党注《五代史》，粗言欧公书法义例，他未之及也。《通鉴》先有刘安世《音义》十卷，而世不传。《释文》本出于蜀史炤，冯时行为之序，今海陵板本又有温公之子康释文，与炤本大同而小异。公休于书局为检阅官，是其得温公辟呬之教诏，刘、范诸公群居之讲明，不应乖刺乃尔，意海陵《释文》非公休为之。若能刊正乎？’三省捧手对曰：‘愿学焉’。乙巳，先君卒，尽瘁家蛊，又从事科举业，史学不敢废也。宝祐丙辰，出身进士科，始得大肆其力于是书。游宦远外，率携以自随；有异书异人，必就而正焉。依陆德明《经典释文》，厘为《广注》九十七卷；著论十篇，自周迄五代，略叙兴亡大致。咸淳庚午，从淮壩归杭都，延平廖公见而黠之，礼致诸家，俾讎校《通鉴》以授其子弟，为著《讎校通鉴凡例》。廖转荐之贾相国，德祐乙亥，从军江上，言辄不用，既而军溃，间道归乡里。丙子，浙东始骚，辟地越之新昌；师从之，以孥免，失其书。乱定反室，复购得他本为之注，始以《考异》及所注者散入《通鉴》各文之下。历法、天文则随目录所书而附注焉。迄乙酉冬，乃克彻编。凡纪事之本末，地名之同异，州县之建置离合，制度之沿革损益，悉疏其所以然。若《释文》之舛谬，悉改而正之，著《辨误》十二卷。呜呼！注班书者多矣；晋灼集服、应之义，而辨其当否；臣瓚总诸家之说，而驳以己见。至小颜新注，则又讥服、应之疏紊尚多，苏、晋之剖断盖眇；譬臣瓚以差爽，诋蔡谟以牴牾。自谓穷波讨源，构会甄释，无复遗恨；而刘氏兄弟之所以议颜者，犹颜之议前人也。人若不自觉，前注之失，吾知之；吾注之失，吾不能知也。又，古人注书，文约而义见；今吾所注，博则博矣，反之于约，有未能焉。世运推迁，文公儒师，从而凋谢，吾无从而取正，或勉以北学于中国，嘻，有志焉，然吾衰矣！旗蒙作噩冬十有一月乙酉日长

至，天台胡三省身之父书于梅磻螭居。”按：旗蒙作噩为乙酉，即元世祖至元二十二年。

袁桷《清容居士集》卷三〇三《师友渊源录》：“胡三省，天台人，宝祐进士。贾相馆之。释《通鉴》三十年。兵难，稿三失。乙酉岁留袁氏塾，日手抄定注。己丑寇作，以书藏窖中得免。定注今在家。”

《千顷堂书目》卷四《编年类》：“胡三省《音注资治通鉴》二百九十四卷。”又卷五《史学类》：“胡三省《资治通鉴释文辨误》十二卷。”

《四库全书总目提要》卷四七《史部·编年类》：“《资治通鉴》二百九十四卷，宋司马光撰，元胡三省音注。光以治平二年受诏撰《通鉴》，以元丰七年十二月戊辰书成奏上，凡越十九年而后毕。……其书网罗宏富，体大思精，为前古之所未有，而名物训诂，浩博奥衍，亦非浅学所能通。光门人刘安世，尝撰《音义》十卷，世已无传。南渡后注者纷纷，而乖谬弥甚，至三省乃汇合群书，订讹补漏，以成此注。……《通鉴》文繁义博，贯穿最难。三省所释，于象纬推测、地形建置、制度沿革诸大端，极为赅备。……至《通鉴》中或小有牴牾，亦必明著其故。……并能参证明确，而不附会以求其合，深得注书之体。……虽征摭既广，不免检点偶疏，……顾炎武《日知录》并纠其失，近日陈景云亦摘地理讹舛者作《举正》数十条，然以二三百卷之书，而蹉失者仅止于此，则其大体之精密，益可概见。”

《四库全书总目提要》卷四七《史部·编年类》：“《资治通鉴释文辨误》十二卷，元胡三省撰。《通鉴释文》本南宋时蜀人史炤所作，浅陋特甚。时又有海陵所刊《释文》，称司马康本；又蜀广都费氏进修堂版行《通鉴》，亦以注附之，世号《龙爪通鉴》，皆视史炤本差略，而实相蹈袭。三省既自为《通鉴音注》，复以司马康《释文》本出伪托，而史炤所作，讹谬相传，恐其疑误后学，因作此书以刊正之。每条皆先举史炤之误，而海陵本、龙爪本与之同者，则分注其下。其已见于此书者，音注之中，即不复著其说。……其书援据精核，多足为

读史者启发之助。所云音训之学，因为见义，各有攸当，不可滞于一隅；又云晋、宋、齐、梁、陈之疆里，不可以释唐之疆里，其言实足为千古注书之法，又不独为史炤一人而设矣。”

1286 元世祖至元二十三年 丙戌

撒里蛮请以畏吾字翻译元累朝实录。

《元史》卷一四《世祖纪》一一：至元二十三年十二月“戊午，翰林承旨撒里蛮言：‘国史院纂修太祖累朝实录，请以畏吾字繙译，俟奏读，然后纂定。’从之。”

1288 元世祖至元二十五年 戊子

王恽著成《玉堂嘉话》。

王恽《玉堂嘉话序》：“中统建元之明年，辛酉夏五月，诏立翰林院于上都，故状元文康王公授翰林学士承旨。已而公谓不肖恽曰：‘翰苑，载言之职，莫国史为重。’遂复以建立本院为言，允焉。仍命公兼领其事。时不肖侍笔中书两院故事，凡百草创经营署置，略皆与知。其年秋七月，授翰林修撰、同知制诰兼国史院编修官，方帝泽鸿庞，赉及四海，诰命宣辞，颇与定撰。再阅月，蒙二府交辟不妨供职兼左司都事。自后由御史里行调官晋府，秩满，复入为翰林待制。时则有若左丞相修国史耶律公、承旨霍鲁忽孙安藏、前左辖姚公、大学士鹿庵王公、侍讲学士徒单公、河南李公、待制杨恕、修撰赵庸、应奉李谦，不肖虽承之几于一考，其获从容待接，仰其祖宗对天之鸿休，圣训无穷之睿思，皆闻所未闻者。至于文章高下，典制沿革，朝夕饫饩，所得亦云多矣。今也年衰气耄，尽负初心，因绌绎所记忆者，凡若干言，辑为八卷，题之曰《玉堂嘉话》。其或灯火茆堂之夜，尊罍心赏之间，吐嘉话于目前，想玉堂于天上。鸣息有时，盛年

不再，良可叹也！然昔人有宅位钧衡，不得预天子，私人为恨。顾惟此生不为未遇，用藏家柜，以贻将来。至元戊子冬季二日，前行台侍御史王恽谨序。”

《千顷堂书目》卷一二《小说类》：“王恽《玉堂嘉话》八卷。”

《四库全书总目提要》卷一二二《子部·杂家类》六：“《玉堂嘉话》八卷，元王恽撰。……是编成于至元戊子。纪其中统二年初为翰林修撰知制诰兼国史馆编修官，及调官晋府秩满，至元十四年复入为翰林待制时一切掌故，及词馆中考核讨论诸事。始于辛酉，终于甲午，凡三十四年之事。所记当时制诰特详，足以见一朝之制。”

1289 元世祖至元二十六年 己丑

《读史旬编》等作者马廷鸾卒。

《宋史》卷四一四《马廷鸾传》：“咸淳……八年，九疏乞罢政。……自罢相归，又十七年而薨。所著《六经集传》、《语孟会编》、《楚辞补记》、《洙泗裔编》、《读庄笔记》、《张氏祝氏皇极观物外篇》诸书。”

按：据《宋史》本传，马廷鸾于宋度宗咸淳八年（公元1272年）罢相归后十七年而卒，故编于此。

1290 元世祖至元二十七年 庚寅

《元定宗实录》、《元太宗实录》修成。

《元史》卷一六《世祖纪》一三：至元二十七年六月“丁酉，大司徒撒里蛮、翰林学士承旨兀鲁带进《定宗实录》。……十一月……壬戌，大司徒撒里蛮、翰林学士承旨兀鲁带进《太宗实录》。”